

之公子又曰太昊乘震執規司春玉衡秉信珠斗
回仁蒼驪駕而協氣和亂鳥巢而條風溫于斯之
時紅藥翻借朱槿蔭庭靈運賦池艸而冥機自觸
孝綽感山櫻而雅韻攸成炎帝成離執衡司夏赤
鷲鳴晨丹良燭夜于斯之時蘿煙裊帷松風入樹
江淹懷綺樹而興慨辛蘭傅元思秀麥而宣謠田
稼少昊乘兌執矩司秋悲臺蕭瑟哀壑颺颺鵲梁
迴面津橋橫蟾桂芬而月殿幽于斯之時竹君萬
箇木奴千頭左思睇翔鳳而金飈初動潘岳咏歸
燕而玉露方流顓頊乘坎執權司冬同雲集霰寒

澌凝淙日陸旋而品彙藏星紀周而象緯從于斯
之時令屬元英律應黃鐘穆王躋平圃而白雲縹
緲梁王遊兔園而素雪玲瓏先生漸儀鴻羽鼎食
雉膏煦春元而熙熙茂夏亨而陶陶廣秋利而肅
肅乎冬貞而昭昭無乃順四時周六虛于焉居諸
爾矣乎先生曰善言天者必徵諸人善言古者必
準諸今子言近矣願終陳之公子又曰粵稽有漢
西雍是京峩峩虎觀蜿蜒鳳城麒麟燾泉而芙蓉
披鳩鵲翹顙而椒蘭榮迺有承明之廬若作之庭
銅龍承宇金馬標門方朔占歲星之色象更生招